

Vumm Wedder unn vumm Verreise

Omm Stommdisch omm Sunndaach hadde merrs vumm Wedder unn vumm Verreise unn hawwe gemoont, dasses ferr unserooner villeicht omm besde wär, jetz gar nitt fortzefahrn, naa, dehoom ze bleiwe unn die Modelleiseboh widder mol uffzebaue.

Sät de Karl: Mir Rentner hawwe joo Zeit, mir kenne fortfahrn odder dehoombleiwe unn wadde, bisses im August odder im September besser werdd. Bei junge Leit awwer isses was onnersders. Unn wenn se donn noch Familie unn Kinner hawwe, donn misse se in de Ferie ihrn Urlaub mache unn doo isses koo Wunner, wenn se bei su emm Reeschedder unn dere Kält garnitt hier im Lond bleiwe wolle unn doodeferr ins Auslond fliesche, onns Mittelmeer odder uff die Kanare.

Doo hawwes awwer, moont de Schorsch, uff de Kanare issen mords Wind unn in de Türkei iss e Hitz, doo kann merr nitt vor die Hoteldier. Awwer du host recht, Karl, weil die Leit mett Kinner, die dehoom bleiwe misse, weesche dem Wedder nitt ins Schwimmbad gieh kenne, unn wenss donn e paar Daach werklisch warm werdd misse se enn Haufe Geld ferr de Oitritt bezahle.

Isch saach: Isch moon, dess det immer schlimmer werrn mett dene verreeschende und kalde Summer.

De Schorsch hott de Finger gehowwe. Naa, dess iss enn Summer, wies enn schunn immer gewwe hott. Denk doch emol droo, wie de Rudi Carrell gesunge hott: Wann wird's mal wieder richtig Sommer ... dess war ...

Sät de Karl: Grad die Woch habb ischs gelese, dess war 1975, wie de Carrell dess gesunge hott.

Gut, saach isch, awwer dess mettem Reesche im Summer, dess werdd so bleiwe in de nächsde Johrn. Stellt eich doch emol vor, weils wärmer werdd uff de Erd dut immer mehr Wasser vom Meer verdunste, unn dess was owwe iss muss aach widder erunner. Unn die Energie, die die Sunn gebraucht hott, dess ville Wasser hochzeheewe, die kimmt als Unwetter mett Storm unn Haachel widder erunner.

De Karl hott mettem Kobb gewackelt: Wenn dess su wär, Honnes, doo wärs werklisch koo Wunner, wenn die Leit enaus in die Welt wolle unn wenss uff de Mount Everest odder in die Antarktis iss, doo waaß merr wenischdens dasses dort kalt iss. Du konnst dess joo jeden Daach lese: Wenn irschendwo in de Welt e Fluchzeuch absterrze odder e Lawin erunnergiehe dut, sinn e paar Deutsche debei.

Moont de Schorsch: Warum misse aach die Leit, aach die in unserm Alder, alsfort mettem Fluchzeich irschendwohie fliesche, mir wolle doch aach nimmi.

Schorsch, saach isch, mir sinn doch frieher aach gefloche, unn wenn ooner vunn uns Alde heit moont, nor weils emm hinne unn vorne wieh dut, die onnern Alde missde nitt su vill fliesche, doo denk isch immer onn die Geschicht vom Fuchs unn de Trauwe.

Erzähl, sät de Karl.

Hoffentlich krieg ischs noch zesomme, saach isch. Also: Enn Fuchs iss onn e Mauer kumme, onn der war enn Woistock mett scheene große Trauwe. Unn weil de Fuchs die gern gefuddert hätt, isser alls hochgehibbt, iss awwer nitt drookumme. Uff emm Baum denewer hott enn Rabert gehockt unn hott dem Fuchs zugeguckt. Wie de Fuchs dess gemerkt hott hotter uffgeheert ze hibbe unn iss fortgeschliche, hott vorher awwer noch so laut, dasses de Rab geheert hott, gesaat: Isch loss die Trauwe hänge, die sinn merr sowieso ze sauer. Dess heeßt, wenn ooner nimmi kann, dann säter, er det nimmi wolle. Eiern Honnes.